

四家醫案跋

或問醫案古有之乎。曰。古有診籍。扁鵲倉公傳所記是也。曰。驗乎。曰。古今不同。其品齊輕重。不可得而悉也。然則柳先生奚爲輯是書也。曰。時近而文顯。時近則陰陽之診同。文顯則質直而易曉。抑且商榷微眇。稱量而出。不啻其自爲之也。先生所輯者八家。今先刊者四種。其門人王君吉臣、柳君頌餘、金君蘭升、勾資成之。三君守師法。篤風義。良足稱述。金君屬敘於余。余不知醫。勉贅數語。以質世之善讀書者。時

光緒甲辰四月常熟翁同龢

惜餘小舍評選各家醫案編目次序

內傷雜病 勞倦 七情 脾胃

類中 中風 類中

痿痺 痿躄 痺痛 麻木 拘攣

內風 肝風 癱厥 眩暈

神志 顛狂 癇 怔忡 驚悸 健忘 不寐

痰火

痰飲 飲證 痰閉

欬喘 欬嗽 喘哮 失音 喉痺 肺癰 肺痿

失血 欬血 衄血

虛損

汗

消

諸鬱 氣鬱

嘔噦 嘔吐 噎膈 反胃 呃逆 噎噤 館雜

伏氣 溫熱

外感 風溫 冒寒 雜感

暑 中暑 傷暑 伏暑

濕 濕熱 寒濕

痧疫 瘟疫 霍亂 時痧

瘧疾

黃疸

痺氣 胸痺 肺痺 腸痺 胞痺

脘腹痛 脘痛 腹痛 少腹痛 厥痛

疝氣

癰癤 疥癩 積聚

腫脹 鼓脹 痞滿 浮腫

頭痛 頭風

肢體諸痛 肩臂胸背脇肋腰脊髀膝肢節諸痛

諸竅 七竅 咽喉

腳氣

遺精

小便 淋濁 癃閉 澀血

泄瀉

痢疾

大便 便血 痔漏 脫肛 便閉 交腸

蟲 狐惑 諸蟲 蠱毒

內癰

外瘍雜證 痰癰

婦人 胎前 產後 經帶 雜病

小兒

凡編選醫案。其分列門類。最難清楚。蓋一病中每有兼證錯見。既可列於此門。亦可入於彼類也。此次擬定總目四十。而以子目分註於下。凡集中錄案多者。標明總目。分門編列。如錄案無多。即不復分標門類。而編列前後。則仍依此目爲序。以便讀者可依目檢尋也。

清柳寶詒選評

(191)

卷

上海衛生出版社

柳選四家醫案

神志門	一八二
痰火門	一八五
痰飲門	一八七
欬喘門	一九二
失血門	二〇四
虛損門	二二一
消證門	二二六
諸鬱門	二二八
環溪草堂醫案中卷	
嘔噦門	二二二
伏氣門	二二九
暑病門	二四五
瘧疾門	二五〇

黃瘧門	二五五
痺氣門	二五八
脘腹痛門	二五九
疝氣門	二六四
癰癤門	二六五
環溪草堂醫案下卷	
腫脹門	二七二
頭痛門	二七九
諸瘡門	二八〇
痧疫門	二八一
腳氣門	二八三
遺精門	二八四
小便門	二八六

痢疾門	二九〇
便血門	二九七
蟲病門	三〇〇
內癰門	三〇一
外瘍門	三〇三
婦人門	三一
小兒門	三五
愛廬醫案	
內傷雜病門	三三〇
內風門	三三一
溼病門	三三三
失血門	三三四
消證門	三三五

嘔逆門	三三六
外感門	三三八
伏氣門	三四一
疫邪門	三四二
瘧疾門	三四四
黃瘧門	三四五
腹痛門	三四七
腫脹門	三四七
癰癤門	三四八
痢疾門	三四九
大便門	三五二
外瘍門	三五二
婦人門	三五三

評選靜香樓醫案兩卷

此案爲尤在涇先生所著。先生名怡。字在涇。自號銅鶴山人。江蘇長洲縣人。邃於醫學。於仲景書尤能鑽研故訓。獨標心得。時吳下以醫名者。如葉氏桂、徐氏大椿、王氏子接、均煊耀一時。先生與之聯鑣接軫。輝映後先。於醫道中可謂能樹一幟者。所著有傷寒論貫珠集、金匱心典、醫學讀書記、均刊行。惟此案未經授梓。其附刻於讀書記後者。僅有三十餘條。非全本也。此本爲吾邑吳氏所鈔藏。咸豐兵燹後。論於詹文橋張氏齋頭見之。假歸鈔錄。復就其中選精粹者。得十之五。評錄如左。分上下兩卷。竊念近時醫學荒廢。其簡陋剽襲。毫無心得者。無論已。間有鑽研古籍。不知通變者。動輒以仲景爲家法。而咎今人不能用古方。目爲庸陋。其實古方今病。往往柄鑿不相入。執而用之。僨事者多矣。及讀先生此案。而不覺憬然有悟也。先生博極羣籍。尤服膺仲景之書。所著傷寒論金匱兩注。上溯仲景心傳。獨抒己見。讀其書者。無不知先生之於仲景。不啻升其堂而入其室已。乃觀此案。論病則切理壓心。源流俱澈。絕不泛引古書。用藥則隨證化裁。活潑潑地。從不蹈襲成方。可見食古期乎能化。裁制貴乎因時。彼徒執古書者。不且與王安石之周官、房琯之車戰。其弊適相當哉。是故讀他人之

案。有不用古方者。或猶疑其服古未深。未能得力於仲景也。若先生則讀書不可謂不多。用功不可謂不切。其沈酣於仲景之書。尤不可謂其不深。乃其論病之平易近情也如是。立方之妥帖易施也如是。是則此案不第爲治病之良規。并可爲讀古之心法已。用書之以謗後之讀此案者。光緒二十六年庚子二月下旬江陰後學柳寶詒識

評選靜香樓醫案上卷

長洲 尤 怡在涇 著 江陰 柳寶詒 穀孫 選評

內傷雜病門

陰虧於下。陽浮於上。服八味丸不效者。以附子走竄不能收納耳。宜加減法。

桂都氣丸

詒按 議論精細。可爲用藥者開一悟境。

肝陽盛。肝陰虛。吸引及腎。腎亦傷矣。益肝體。損肝用。滋養腎陰。俾水木相榮。病當自愈。

生地 白芍 小薊 赤芍 當歸 血餘 丹皮

阿膠 甘草 茅根

詒按 此必因肝火而見血者。故方藥如此。

左關獨大。下侵入尺。知肝陽亢甚。下吸腎陰。陰愈虧。則陽益張矣。滋水清肝。乃正法也。

知藥八味丸 加天冬 龜板 杞子

詒按 方中似宜再增清肝之品。

陰不足者。陽必上亢而內燔。欲陽之降。必滋其陰。徒恃清涼無益也。

生地 知母 甘草 黑梔 麥冬 元參 丹皮

地骨皮

詒按 案語精粹。有名雋氣。

腎精不足。肝火乘之。故有筋攣骨痠。耳竅二陰氣出等證。夫肝火宜泄。腎精宜闔。於一方之中。兼通補之法。庶幾合理。然非旦夕所能奏功也。

生地 川棟子 茯苓 阿膠 丹皮 女貞子

詒按 論病深中肯綮。方中可增白芍、牡蠣。

肝陰不足。肝火偏勝。傷肺則欬。自傷則脇痛。

阿膠 兜鈴 丹參 炙草 歸身 白芍 玉竹

川斛

詒按 既有脇痛見證。似當兼與通絡清肝。宜加丹皮、山梔、青皮、橘絡、旋覆、等味。

咯血脇痛。項下有核。脈數惡熱。咽痛便澹。此肝火乘脾之證。反能食者。脾求助於食。而又不

能勝之。則痞耳。治在制肝益脾。

白芍 茯苓 川連 牡蠣 炙草 木瓜 益智
阿膠

詒按 論病明快。方中擬加丹、梔、夏枯草。

飲食既少。血去過多。陰氣之傷。蓋已甚矣。茲復憂勞驚恐。志火內動。陰氣益傷。致有心煩、體痛、頭疼等證。是當滋養心肝血液。以制浮動之陽者也。

生地 石斛 麥冬 丹皮 元參 知母 茯苓
甘草

詒按 肝陰既虧。肝火上升。宜再加歸、芍。以滋養之。羚羊、菊、梔。以清泄之。

肝藏失調。侵脾。則腹痛。侮肺。則乾欬。病從內生。非外感客邪之比。是宜內和藏氣。不當外奪衛氣者也。但脈弱而數。形瘦色槁。上熱下寒。根本已漓。恐難全愈。

歸身 白芍 炙草 茯苓 桂枝 飴糖

詒按 此內補建中法。宜於腹痛。而不宜於乾欬。宜加清肝保肺之味。乃爲周匝。

形盛脈充。兩尺獨虛。下體麻痺。火浮氣急。此根本不固。枝葉雖盛。未足恃也。

熟地 山藥 沙苑 杞子 丹皮 茯苓 桑椹
牛膝

詒按 如此脈證。似可參用腎氣法。以溫攝之。

眞陽以腎爲宅。以陰爲妃。腎虛陰衰。則陽無偶而蕩矣。由是上炎則頭耳口鼻爲病。下走則膀胱二陰受傷。自春及秋。屢用滋養清利之劑。欲以養陰。而適以傷陽。不能治下。而反以戕中。內經所謂熱病未已。寒病復起者。是也。鄙意擬以腎氣丸。直走少陰。據其窟宅而招之。同聲相應。同氣相求之道也。所慮者。病深氣極。藥入不能制病。而反爲病所用。則有增劇耳。

腎氣丸

詒按 立論透切。醫案中僅見之作。

眞陽氣弱。不榮於筋。則陰縮。不固於裏。則精出。不衛於表。則汗泄。此三者。每相因而見。其病在三陰之樞。非後世方法可治。古方八味丸。專服久服。當有驗也。

八味丸

詒按 見識老到。議論明確。此爲可法可傳之作。

胃寒背冷。食入則倦。喜溫惡清。以背爲陽位。胃爲陽土。土寒。則食不運。陽傷。則氣不振也。治

宜溫養陽氣。

人參 桂枝 益智仁 厚朴 炮薑 茯苓 炙草
白朮

詒按 此溫中和氣。平正通達之方。

中氣虛寒。得冷則瀉。而又火升齒齲。古人所謂。胸中聚集之殘火。腹內積久之沈寒也。此當溫補中氣。俾土厚。則火自斂。

四君子湯 加益智仁 乾薑

詒按 議病立方。均本喻氏。近時黃坤載亦有此法。

類中門

類中偏左。於法爲逆。猶幸病勢尙輕。可以緩圖取效。原方補少通多。最爲合理。惟是陽脈則緩。陰脈則急。所以指節能屈不能伸。此亦病之關鍵處。不可忽也。經云。肝苦急。宜食甘以緩之。於前方中。增進陰藥之甘潤者一二。更爲美備。

人參 茯苓 半夏 白朮 炙草 橘紅 麥冬

竹瀝 薑汁

詒按 此六君加麥冬、竹瀝、薑汁也。

再診 加當歸

脈虛而澀。左半手足麻痺。食不知味。此氣血不能運行周體。乃類中之漸也。

桂枝 茯苓 歸身 半夏 炙草 黃耆 天麻
首烏

詒按 滋養疎化。虛實兼到。

內風本皆陽氣之化。然非有餘也。乃二氣不主交合之故。今形寒跗冷。似宜補陽爲是。但景岳云。陽失陰而離者。非補陰無以攝。既散之元陽。此證有升無降。舌絳牽掣。瘖不出聲。足臂不堪行動。當與河間肝腎氣厥同例。參用丹溪虎潛法。

熟地 萸肉 牛膝 鎖陽 虎骨 龜板

詒按 持論明通。立方簡當。

再診 地黃飲子、去附子、加鹿鞭子、煎膠打丸。

熱風中絡。口歪舌蹇。咽痛。治以清滋。

羚羊角 元參 鈎藤 甘菊 甘草 石菖蒲 生地

竹瀝

再診 生地 阿膠 麥冬 知母 貝母 甘菊

甘草 元參

三診 咽喉乾痛。滋清不愈。宜從降導。

腎氣丸 淡鹽湯送下

詒按 先清之。繼滋之。終用引火下行之法。步伐井然。凌躡急功者。可取法焉。

方書每以左癱屬血虛。右瘓屬氣虛。據述頻年已來。齒疼舌赤。常有精濁。納穀如昔。卒然右偏肢痿。舌強口喎語蹇。脈浮數動。此乃肝腎兩虛。水不涵木。肝風暴動。神必昏迷。河間所謂肝腎氣厥。舌瘖不語。足痹無力之證。但腎屬坎水。真陽內藏。宜溫以攝納。而肝藏相火內寄。又宜涼以清之。溫腎之方。參入涼肝。是爲複方之用。

地黃飲子去桂附 加天冬 阿膠

詒按 卽古法而化裁之。參詳脈證。斟酌盡善。

寒熱後。邪走手少陰之絡。猝然不語。肩背牽引不舒。宜辛以通之。

菖蒲 遠志 甘草 木通 當歸 丹皮 丹參
茯苓

治按 方法輕靈。恰合餘邪入絡治法。

脈濡。按之則弦。右肩及手指麻木。兩腿痠癢。難以名狀。此脾飲肝風。相合爲病。乃類中之漸。不可不慎。

首烏 天麻 刺蒺藜 羚羊角 炙草 茯苓 半夏

白芍 丹皮 廣皮 薑汁和竹瀝泛丸

治按 以二陳、薑汁、竹瀝、除痰飲。以丹芍、羚羊、蕤首烏、天麻、治肝風。兩層俱到。就見證論。歸身、牛膝、橘絡、亦可加入。

痿痺門

脈虛而數。兩膝先軟後腫。不能屈伸。此溼熱乘陰氣之虛而下注。久則成鶴膝風矣。

生地 牛膝 茯苓 木瓜 丹皮 薏仁 山藥
萸肉 澤瀉 萆薢

詒按 正虛着邪。故補散宜並用。溼而兼熱。故滋燥不可偏。此以六味治陰虛。增入牛膝、木瓜、薏仁、草解。以除溼熱。所謂虛實兼顧也。

內風門

肢麻頭運。此肝病也。便溼食減。脾亦病矣。宜節勞養氣。毋致風動爲佳。

羚羊角 白朮 刺蒺藜 茯苓 炙草 天麻 白芍
廣皮

詒按 肝脾兩治。方法周到。

眩運、嘔惡、胸滿。小便短而數。口中乾。水虧於下。風動於上。飲積於中。病非一端也。

羚羊角 細生地 鉤勾 天麻 茯苓 廣皮 半夏
竹茹

詒按 病非一端。方卻打成一片。非熟於制方之義者不能。擬再增生牡蠣。

再診 前方去生地 加麥冬

三診 人參 茯苓 麥冬 羚羊角 天麻 半夏